



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁ**

ք. Երևան

18.08.2020թ.

**Ո Ր Ո Շ ՈՒ Մ**

**ՀՀ գնումների հետ կապված բողոքներ քննող անձի  
թիվ ԱՑ-ՆԳ-2020/162**

Հայաստանի Հանրապետության գնումների հետ կապված բողոքներ քննող անձը՝  
ի դեմս Գրիգոր Ներսիսյանի,

Մասնակցությամբ՝

«Թորքաբանության ազգային կենտրոն» ՊՈԱԿ-ի ներկայացուցիչ Ա. Աբգարյանի  
(լիազորագիր տրված 29.07.2020թ.),

Ա/Ձ Դավիթ Հովհաննեսի Հովհաննիսյանի (պետական գրանցման վկայական թիվ  
264.1070858),

ուսումնասիրելով Հայաստանի Հանրապետության ֆինանսների նախարարության՝  
21.07.2020թ. թիվ 26/26-1/10892-2020 գրությամբ Ա/Ձ Դավիթ Հովհաննեսի  
Հովհաննիսյանին գնումների գործընթացին մասնակցելու իրավունք չունեցող  
մասնակիցների ցուցակում ներառելու նպատակով նախաձեռնված ընթացակարգով  
ներկայացված հիմքերը, պարզեցի հետևյալը.

**1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, «Թորքաբանության ազգային կենտրոն» ՊՈԱԿ-ի  
(հետայսու նաև՝ Պատվիրատու) 14.07.2020թ. թիվ 356 գրության հիման վրա, 21.07.2020թ.

թիվ 26/26-1/10892-2020 գրությամբ նախաձեռնել է Ա/Ձ Դավիթ Հովհաննեսի Հովհաննիսյանին (հետայսու նաև՝ Մասնակից) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

## **2. Ա/Ձ Դավիթ Հովհաննեսի Հովհաննիսյանի ներկայացրած փաստաթղթերը և դիրքորոշումը.**

Ա/Ձ Դավիթ Հովհաննեսի Հովհաննիսյանը Գնումների հետ կապված բողոքներ քննող անձին ուղղված 24.07.2020թ. գրությամբ հայտնել է հետևյալը.

«Ի պատասխան Ձեր 23 հուլիսի 2020թ. էլ. փոստով ստացված գրության և ՀՀ Ֆինանսների նախարարության 21.07.2020թ թիվ 26/26-1/10892-2020 գրությամբ նախաձեռնած Ա/Ձ Դավիթ Հովհաննեսի Հովհաննիսյանին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգի վերաբերյալ հայտնում եմ, որ ս.թ. հուլիսի 2-ին փաստաթղթային եղանակով բողոք եմ մուտք արել ՀՀ Ֆինանսների նախարարություն (այսուհետ՝ Նախարարություն) «ԹԱԿ-ԳՀԱՊՁԲ20/44» ծածկագրով մրցույթի վերաբերյալ: Այնուհետև նկատելով, որ բողոքում առկա է սխալ կապնվել եմ Նախարարություն, որտեղից ասել եմ, որ ճշտված տարբերակը ուղարկեմ [secretariat@minfin.am](mailto:secretariat@minfin.am) էլ-փոստին: Նույն օրը ուղարկել եմ փաստաթղթերը նշված էլ-փոստին, այս անգամ էլ վճարման պահանջագիրը մոռանալով կցել: 22.07.2020թ. ստացել եմ ծանուցում գնումների հետ կապված բողոքներ քննող անձ Լ. Օհանյանից, որ շտկեմ և ներկայացնեմ սահմանված ձևաչափին համապատասխան թղթեր: Համապատասխան շտկումներով փաստաթուղթը ուղարկել եմ [secretariat@minfin.am](mailto:secretariat@minfin.am) էլ-փոստին և 23.07.2020թ-ին ստացել եմ իմ ներկայացրած բողոքի հայտարարությունը:

Հաշվի առնելով, որ տվյալ «ԳԲԲԱ-ԼՕ-2020/85» ծածկագրով նախաձեռնված է բողոք նույն մրցույթի հետ կապված, խնդրում եմ Ձեզ հնարավորության դեպքում հետաձգել ինձ գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգը, մինչ բողոքի ավարտը»:

Մասնակիցը, պատշաճ ծանուցված լինելով ՍՑ-ՆԳ-2020/162 ընթացակարգի շրջանակներում 31.07.2020թ. ժամը 10:00-ին հրավիրված նիստի վերաբերյալ, ապահովել է նիստին իր մասնակցությունը:

**3. «Թոքաբանության ազգային կենտրոն» ՊՈԱԿ-ի կողմից ներկայացված փաստարկները և դիրքորոշումը.**

«Թոքաբանության ազգային կենտրոն» ՊՈԱԿ-ը ՀՀ ֆինանսների նախարարությանն ուղղված 14.07.2020թ. թիվ 356 գրությամբ հայտնել է, որ ՀՀ ԱՆ «Թոքաբանության ազգային կենտրոն» ՊՈԱԿ-ի կարիքների համար բջջային հեռախոսներ/սմարթֆոնների ձեռքբերման նպատակով 16.06.2020թ. թիվ «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգով՝ բաղկացած մեկ չափաբաժնից, թղթային ձևով հայտարարված մրցույթին ի թիվս այլ մասնակիցների մասնակցության հայտ է ներկայացրել նաև Ա/Ձ Դավիթ Հովհաննեսի Հովհաննիսյանը: Վերջինիս հայտը գնահատող հանձնաժողովի որոշման համաձայն 13.07.2020թ. թիվ 7 արձանագրությամբ մերժվել է, համաձայն ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 67-րդ կետի՝ մասնակցի ներկայացրած տվյալների իսկության ստուգման արդյունքում տվյալները որակվել են իրականությանը չհամապատասխանող:

Պատվիրատուն Գնումների հետ կապված բողոքներ քննող անձին ուղղված 30.07.2020թ. գրությամբ հայտնել է հետևյալը.

«Պատվիրատուի կարիքների համար բջջային հեռախոսներ/սմարթֆոնների ձեռքբերման նպատակով 16.06.2020 թվականին թիվ «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգով՝ բաղկացած մեկ չափաբաժնից, թղթային ձևով հայտարարված մրցույթին ի թիվս այլ մասնակիցների մասնակցության հայտ է ներկայացրել նաև Ա/Ձ Դավիթ Հովհաննեսի Հովհաննիսյանը (այսուհետ նաև՝ Մասնակից): Հրավերով նախատեսված պայմանագրի նախագծի տեխնիկական բնութագիր-գնման ժամանակացույցով սահմանվել է նաև՝ «Երաշխիքային ժամկետն առնվազն 1 տարի: Երաշխիքային սպասարկման ապահովում արտադրողի պաշտոնական սպասարկման կենտրոնում (հրավերով նախատեսված՝ առաջարկվող ապրանքի տեխնիկական բնութագիրը ներկայացնելիս տրամադրվում է նաև սպասարկման կենտրոնի տվյալները)»: Մասնակիցը մասնակցության հայտի հավելված 1.1-ով ներկայացրել է «Itel» ֆիրմային բջջային հեռախոսներ, նշելով արտադրողի պաշտոնական երաշխիքային սպասարկման կենտրոնի («ԱԴԴ» ՍՊԸ, (Ռեմզոն)) հասցեն և հեռախոսահամարը: Քանի որ, ընթացակարգը կազմակերպվել էր «Գնումների մասին» ՀՀ օրենքի 15-րդ հոդվածի 6-րդ

մասի հիման վրա, գնահատող հանձնաժողովը (այսուհետ նաև՝ Հանձնաժողով) համաձայն ՀՀ կառավարության 2017 թվականի մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 40-րդ կետի 5-րդ ենթակետի, ընտրված և հաջորդաբար տեղեր զբաղեցրած մասնակիցներին որոշելու նպատակով առաջարկված գների նվազեցման նպատակով ոչ գնային պայմանները բավարարող գնահատված բոլոր մասնակիցներին հրավիրում է բանակցությունների: Բանակցությունների ընթացքում մասնակից՝ «Նոուֆրուք Սթոր» ՍՊԸ-ն պահանջել է հանձնաժողովի քարտուղարից (այսուհետ նաև՝ Քարտուղար) իրեն տրամադրել մասնակիցների կողմից ներկայացված ապրանքների ամբողջական նկարագրերում հրավերի պահանջների նկատմամբ տեղ գտած անհամապատասխանությունների շտկված տարբերակները: Քարտուղարը հիմք ընդունելով Կարգի 32-րդ կետի 4-րդ ենթակետով սահմանված պահանջը, տրամադրում է պահանջած փաստաթղթերը, որից հետո «Նոուֆրուք Սթոր» ՍՊԸ-ն հայտնում է կարծիք այն մասին, որ Դավիթ Հովհաննիսյան Հովհաննեսի Ա/Ձ-ի կողմից առաջարկվող ապրանքը չունի երաշխիքային սպասարկում արտադրողի պաշտոնական սպասարկման կենտրոնում: Որից հետո Հանձնաժողովը կասեցնում է նիստը և նշյալ պատճառաբանությամբ, համաձայն Կարգի 67-րդ կետի որոշում է կայացնում ստուգել Մասնակցի ներկայացված տվյալների իսկությունը:

02.07.2020 թվականին թիվ 325 գրությամբ Պատվիրատուն դիմում է «ԱԴԴ» ՍՊԸ-ին՝ խնդրելով սեղմ ժամկետում տրամադրել իսկությունը հավաստող փաստաթուղթ այն մասին, որ ընկերությունը հանդիսանում է «Itel» ֆիրմային բջջային հեռախոսների արտադրողի պաշտոնական սպասարկման կենտրոն: Նույն օրը ընկերությունը էլեկտրոնային նամակով պատասխանում է՝ «Մենք հավաստում ենք, որ ԱԴԴ ՍՊԸ-ն /ՌԵՄՁՈՆ/, հանդիսանում է Itel բջջային հեռախոսների արտոնագրված սերվիս կենտրոն, սակայն հավաստող փաստաթուղթ չունենք, անհրաժեշտության դեպքում կարող ենք մեր գործընկերներին խնդրել տրամադրել այն, բայց գործընթացը ժամանակատար է /մոտավորապես մեկ շաբաթ/»: Հանձնաժողովի քարտուղարը կրկին էլեկտրոնային նամակով դիմում է ընկերությանը՝ «Հարգելի գործընկեր խնդրում եմ Ձեր կազմակերպության բլանկի վրա և տնօրենի ստորագրությամբ ուղարկել»: Ընկերությունը նույն օրը թիվ 412 գրությամբ հայտնում է, որ «ԱԴԴ ՍՊԸ-ն /ՌԵՄՁՈՆ/, հանդիսանում է Itel բջջային հեռախոսների արտոնագրված սերվիս կենտրոն»: Ի պատասխան 412 գրության, 03.07.2020 թվականին Պատվիրատուն թիվ 328 կրկնակի գրությամբ դիմում է

Ընկերությանը, խնդրելով տրամադրել արտադրողի պաշտոնական սպասարկման կենտրոն հանդիսանալու վերաբերյալ փաստաթուղթ, որը ստորագրված, կնքված կամ որևէ այլ ձևով հաստատված կլինի արտադրողի կողմից: Պատասխան գրություն կամ էլեկտրոնային նամակ չստանալով 06.07.2020 թվականին Պատվիրատուն էլեկտրոնային նամակով կրկին դիմում է Ընկերությանը՝ խնդրելով բարձրացված հարցին լուծում տալ, սակայն պատասխան չի ստացվել:

Արդեն իսկ, 13.07.2020 թվականին վերսկսվում է Հանձնաժողովի կասեցված նիստը և վերջինիս որոշմամբ Դավիթ Հովհաննիսյան Հովհաննեսի Ա/Ձ-ի հայտը մերժվում է՝ համաձայն ՀՀ կառավարության 2017 թվականի մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի 67-րդ կետի՝ տվյալների իսկության ստուգման արդյունքում դրանք իրականությանը չհամապատասխանելու հիմքով: 14.07.2020 թվականին ժամը 12:36-ին Հանձնաժողովի նիստում կայացրած որոշման 7-րդ արձանագրությունը Քարտուղարը էլեկտրոնային փոստի միջոցով ուղարկում է ընթացակարգի բոլոր մասնակիցներին, որը նույն օրը հրապարակվում է նաև gnumner.am կայքում: 14.07.2020 թվականին ժամը 16:50-ին «ԱԴԴ» ՍՊԸ-ն էլեկտրոնային փոստով գրությամբ ուղարկում է ՕՕՕ "ТРАНСЦИОН ТЕХНОЛОДЖИ РУ" կողմից տրված գրությունը այն մասին, որ «Itel» ընկերությունը հանդիսանում է Թրանսսիոն խմբի դուստր ձեռնարկություն և «ԱԴԴ» ՍՊԸ-ն հանդիսանում է «Itel»-ի հեղինակազորված սերվիս կենտրոն Հայաստանի Հանրապետությունում:

Հատկանշական է այն, որ «ԱԴԴ» ՍՊԸ-ի կայք էջում (remzone.am) նշված են մի շարք ֆիրմային անվանումներ, որոնց երաշխիքային և ետերաշխիքային սպասարկման կենտրոն է հանդիսանում «ԱԴԴ» ՍՊԸ-ն, սակայն «Itel»-ի վերաբերյալ նշում չկա արված:

ՀՀ գնումների հետ կապված բողոքներ քննող անձի ուշադրությունն ենք հրավիրում այն հանգամանքի վրա, որ «ԱԴԴ» ՍՊԸ-ն սկզբնական էլեկտրոնային նամակով հավաստում է, որ հանդիսանում է «Itel» բջջային հեռախոսների արտոնագրված սերվիս կենտրոն, սակայն հավաստող փաստաթուղթ չունի, անհրաժեշտության դեպքում կարող է գործընկերներին խնդրել տրամադրել այն, բայց գործընթացը ժամանակատար է՝ մոտավորապես մեկ շաբաթ: Հանձնաժողովը հաշվի առնելով գործընթացի ժամանակատարությունը, կասեցված նիստը հրավիրում է «ԱԴԴ» ՍՊԸ-ին դիմելու հաջորդող օրվանից հաշված տասնմեկերորդ օրը՝ 13.07.2020թ.-ին, ժամը 15:00:

Հատկանշական է այն, որ Ընկերությունը ООО "ТРАНССИОН ТЕХНОЛОДЖИ РУ"-ի կողմից 14.07.2020 թվականին տրված գրությունն ուղարկում է այն ժամանակ, երբ Մասնակիցը տեղեկանում է, որ հայտը մերժվել է, և կա վտանգ հայտնվելու գնումների գործընթացին մասնակցելու իրավունք չունեցող մասնակիցների ցուցակում»:

Պատվիրատուն, պատշաճ ծանուցված լինելով ՍՑ-ՆԳ-2020/162 ընթացակարգի շրջանակներում 31.07.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով պնդել է ներկայացված դիրքորոշումը:

#### **4. ՍՑ-ՆԳ-2020/162 ընթացակարգի քննության համար էական նշանակություն ունեցող փաստերը.**

ՍՑ-ՆԳ-2020/162 ընթացակարգի քննության համար էական նշանակություն ունեն հետևյալ փաստերը.

1. «Թոքաբանության ազգային կենտրոն» ՊՈԱԿ-ի կողմից իր կարիքների համար բջջային հեռախոսներ/սմարթֆոնների ձեռքբերման նպատակով հայտարարվել է «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով հայտ է ներկայացրել Ա/Ձ Դավիթ Հովհաննեսի Հովհաննիսյանը:

2. Ընթացակարգի գնահատող հանձնաժողովի 01.07.2020թ. նիստի թիվ 5 արձանագրության 7.1 կետի համաձայն՝ որոշում է կայացվել «ԹԱԿ-ԳՀԱՊՁԲ-20/44» ծածկագրով գնման ընթացակարգի նիստը կասեցնելու վերաբերյալ և հիմք ընդունելով Կարգի 67-րդ կետով սահմանված պահանջը, ստուգելու Ա/Ձ Դավիթ Հովհաննեսի Հովհաննիսյանի կողմից հայտով առաջարկված «itel» ֆիրմային բջջային հեռախոսների սպասարկման կենտրոնը, հանդիսանում է արդյոք արտադրողի պաշտոնական սպասարկման կենտրոնը:

3. Ընթացակարգի գնահատող հանձնաժողովի 13.07.2020թ. նիստի թիվ 7 արձանագրության 6.1 կետի համաձայն՝ 02.07.2020թ. Ա/Ձ Դավիթ Հովհաննեսի Հովհաննիսյանի կողմից հայտով առաջարկված «itel» ֆիրմային բջջային հեռախոսների որպես պաշտոնական սպասարկման կենտրոն հանդիսացող «ԱԴԴ» ՍՊԸ-ին ուղարկվել է գրություն, որով Պատվիրատուն խնդրել է տրամադրել իսկությունը հավաստող փաստաթուղթ, արդյոք Ձեր կազմակերպությունը հանդիսանում է «itel» բջջային

հեռախոսների արտադրողի պաշտոնական սպասարկման կենտրոնը: Նույն օրը, «ԱԴԴ» ՍՊԸ-ն էլեկտրոնային փոստի միջոցով հավաստել է, որ վերջինս հանդիսանում է «itel» բջջային հեռախոսների արտոնագրված սերվիս կենտրոն, սակայն հավաստող փաստաթուղթ չունի, անհրաժեշտության դեպքում կարող է գործընկերներին խնդրել տրամադրել այն, բայց գործընթացը ժամանակատար է /մոտավորապես մեկ շաբաթ/: Նույն օրը «ԱԴԴ» ՍՊԸ-ն նաև գրությամբ հայտնել է, որ հանդիսանում է «itel» բջջային հեռախոսների արտոնագրված սերվիս կենտրոնը: 03.07.2020թ. «ԱԴԴ» ՍՊԸ-ին ուղարկվել է գրություն, որով Պատվիրատուն խնդրել է տրամադրել արտադրողի պաշտոնական սպասարկման կենտրոն հանդիսանալու վերաբերյալ փաստաթուղթ, սակայն գրությանը այդպես էլ արձագանք չի ստացվել:

4. Նույն արձանագրության 7.1 կետի համաձայն՝ հիմք ընդունելով Կարգի 67-րդ կետով սահմանված պահանջը՝ Ընթացակարգի գնահատող հանձնաժողովը որոշում է կայացրել Ա/Ձ Դավիթ Հովհաննեսի Հովհաննիսյանի կողմից ներկայացված հայտը մերժելու վերաբերյալ՝ տվյալների իսկության ստուգման արդյունքում իրականությանը չհամապատասխանելու հիմքով:

#### **5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 21.07.2020թ. թիվ 26/26-1/10892-2020 գրությունը, «Թոքաբանության ազգային կենտրոն» ՊՈԱԿ-ի 14.07.2020թ. թիվ 356 գրությունը՝ կից փաստաթղթերով, հայտնում են հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագրի կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

**Օրենքի 34-րդ հոդվածի 1-ին մասի համաձայն՝ *հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:***

«Կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 1-ին ենթակետի գ) պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է ապրանքների գնման դեպքում իր կողմից առաջարկվող ապրանքի տեխնիկական բնութագրերը, իսկ հրավերով նախատեսված դեպքերում նաև առաջարկվող ապրանքի ապրանքային նշանը, ֆիրմային անվանումը, մակնիշը և արտադրողի անվանումը (այսուհետ՝ ապրանքի ամբողջական նկարագիր):

Նույն կետի 19-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ



հանգամանքը համարվում է որպես գնման գործընթացի շրջանակում ստանձնված պարտավորության խախտում:

Այսպես, «Թոքաբանության ազգային կենտրոն» ՊՈԱԿ-ի կողմից իր կարիքների համար բջջային հեռախոսներ/սմարթֆոնների ձեռքբերման նպատակով հայտարարվել է «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել նաև Ա/Ձ Դավիթ Հովհաննեսի Հովհաննիսյանը:

Ընթացակարգի գնահատող հանձնաժողովի 13.07.2020թ. նիստի թիվ 7 արձանագրության համաձայն՝ Ա/Ձ Դավիթ Հովհաննեսի Հովհաննիսյանի կողմից ներկայացված հայտը մերժվել է:

Այսպիսով՝ արձանագրում եմ, որ «Թոքաբանության ազգային կենտրոն» ՊՈԱԿ-ի կողմից իր կարիքների համար բջջային հեռախոսներ/սմարթֆոնների ձեռքբերման նպատակով հայտարարված «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգի շրջանակներում Ա/Ձ Դավիթ Հովհաննեսի Հովհաննիսյանի կողմից 22.07.2020թ. ներկայացվել է բողոք, որը ՀՀ գնումների հետ կապված բողոքներ քննող անձ Լ.Օհանյանի 07.08.2020թ. թիվ ԳԲՔԱ-ԼՕ-2020/85 որոշմամբ բավարարվել է, այսինքն՝ առկա է իրավապարտադիր որոշում, համաձայն որի՝ սույն գնման ընթացակարգի շրջանակներում Ա/Ձ Դավիթ Հովհաննեսի Հովհաննիսյանի ներկայացրած հայտով առաջարկվող ապրանքի ամբողջական նկարագրում առկա են անհամապատասխանություններ, որոնք պետք է արձանագրվեն Ընթացակարգի գնահատող հանձնաժողովի կողմից և Մասնակցին ներկայացվի անհամապատասխանությունը շտկելու վերաբերյալ համապատասխան ծանուցում, ուստի նման պայմաններում սույն գործի շրջանակներում ուսումնասիրվող փաստական հանգամանքները չեն կարող դիտարկվել որպես Ա/Ձ Դավիթ Հովհաննեսի Հովհաննիսյանին գնումների գործընթացին մասնակցելու իրավունք չունեցող մասնակիցների ցուցակում ներառելու հիմք, քանի որ հիմք ընդունելով ԳԲՔԱ-ԼՕ-2020/85 որոշմամբ Գնումների հետ կապված բողոքներ քննող անձի եզրահանգումները՝ «ԹԱԿ-ԳՀԱՊՁԲ-20/44» ծածկագրով գնանշման հարցման ընթացակարգի գնահատող հանձնաժողովն առաջարկվող ապրանքի ամբողջական նկարագրում առկա անհամապատասխանությունների մասով պետք է կիրառի Կարգի 41-րդ կետով սահմանված դրույթները:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

## Ո Ր Ո Շ Ե Ց Ի

Հայաստանի Հանրապետության ֆինանսների նախարարության 21.07.2020թ. թիվ 26/26-1/10892-2020 գրությամբ Ա/Ձ Դավիթ Հովհաննեսի Հովհաննեսիանին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված  
բողոքներ քննող անձ՝**



**ԳՐԻԳՈՐ ՆԵՐՍԻՍՅԱՆ**